



LE GOUVERNEMENT
DU GRAND-DUCHÉ DE LUXEMBOURG
Ministère de l'Éducation nationale,
de l'Enfance et de la Jeunesse

Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 5302 vum honorabelen Här Deputéierte Marc Goergen

Am Kader vun den ënnerschiddleche Karriäre vun de Chargés de cours, Member aus der Réserve de suppléants, mussen déi jeeweileg Kandidaten ënnerschiddlech Konditiounen erfëllen. Et bidden sech hei zwou Méiglechkeeten:

- Chargé de cours B1, groupe d'indemnité B1; sous-groupe d'indemnité « Enseignement » : D'Kandidate mussen eng Attestation de remplacement hunn an een Diplom vum Niveau 4, d. h. ee Secondairesofschlossdiplom.
- Chargé de cours A2, groupe d'indemnité A2; sous-groupe d'indemnité « Enseignement » : D'Kandidate mussen een universitären Diplom vu mindestens dem Niveau 6, d. h. Bachelor, kënnen virweisen an dëse muss a Relatioun mat engem vun den Objektiv vum Enseignement fundamental stoen.

Dës Accèskonditiounen an d'Karriäre B1 an A2 decken sech mat deene beim Staat üblechen an och esou reglementéierte Critèren, déi eng Mindestqualifikatioun um Niveau vum Diplom fir déi concernéiert Karriäre virgesinn. Dernieft mussen d'Kandiaten déi jeeweileg Sproochekonditiounen erfëllen, esou ewéi an der *Loi modifiée du 24 février 1984 sur le régime des langues* festgehalen.

Och wat d'Formatioun ugeet, ginn et signifikant Ënnerscheeder fir déi jeeweileg Cas-de-figures:

- Chargé de cours B1, groupe d'indemnité B1; sous-groupe d'indemnité « Enseignement » : D'Formatiounen, déi am Kader vun der parlamentarescher Fro vum honorabelen Deputéierten ugeschwat ginn an déi de Chargé de cours B1 (Groupe d'indemnité B1, sous-groupe Enseignement) während sengen zwee éischte Berufsjore leescht, kënnen net als Formation en cours d'emploi qualifizéiert ginn. Dës Formatioun si feste Bestanddeel vum Cycle de formation de début de carrière während der Période d'initiation, déi all Employé, dee beim Staat engagéiert gouf, muss duerchlafen, fir esou ee gelongene Start an d'Beruffsliewen ze assuréieren. Am Kader vun dësem Cycle de formation de début de carrière leescht den Agent dës Formatiounsstonnen, déi d'Legislatioun, déi allgemeng Pédagogie an d'Domains de développement et d'apprentissage aus der Grondschoul thematiséieren.

Nieft den theoretische Coursen um Institut de formation de l'Éducation nationale (IFEN) ginn d'Employéen am Kader vun hirer praktescher Formatioun vun enger Personne de référence an de Schoulgebaier begleet, fir esou de Prozess vun der professioneller an der sozialer Integreatioun

am Schoulgebaai während den éischte Berufsjoren ze ënnerstëtzen an d'Wëssen aus den initiale Formatiounen ze consolidéieren.

- Chargé de cours A2, groupe d'indemnité A2; sous-groupe d'indemnité « Enseignement »: Dës Kandidate leeschten an hirem éischte Joer 246 Stonnen am Kader vum Certificat de formation pédagogique, fir esou nieft hirem Bachelordiplom déi néideg Zousatzqualifikatioun ze kréien, fir sech dem Concours kënnen ze stellen, deen den Accès an d'Funktioon vum Instituteur-stagiaire erméiglecht. Am Fall, wou si sech dergéint entscheeden, fir sech dem Concours ze stellen, leeschten si déi theoretesch Formatiounen am Kader vum Cycle de formation de début de carrière am zweete Joer vun der Période d'initiation während de Suivi duerch d'Personne de référence während der integraler Période d'initiation assuréiert gëtt.

Deemno muss hei kloer den Ënnerscheid gemaach ginn tëscht enger berufsbegleedender Weiterbildung, déi ee Bachelorofschloss voraussetzt an dem Kandidat duerno d'Méiglechkeet gëtt, sech dem Concours ze stellen, deen den Accès an d'Funktioon vum Instituteur-stagiaire reegelt, an de Formatioun vum Cycle de formation de début de carrière.

Och am Kontext vun der Evaluatioun vun de Kandidate während de jeeweilege Formatiounen ginn et kloer Ënnerscheeder, jee nodeems a wéi enger Karriär si sinn.

- Chargé de cours B1, groupe d'indemnité B1; sous-groupe d'indemnité « Enseignement »: Am Kader vun hire Formatiounen hunn d'Agenten zwou Epreuven, eng am Däitschen an eng an der Mathematik, wou se eng Unterrechtsstonn virbereeden, dës Unterrechtsstonn mat hire Schüler duerchféieren an duerno reflektéieren. D'Agente kréien op hir Epreuven e formative Feedback, dee keng Konsequenz op d'Bestoe vum Parcours huet. Et ass keng Inspektioun am Kader vun hirer praktescher Formatioun virgesinn.
- Chargé de cours A2, groupe d'indemnité A2; sous-groupe d'indemnité « Enseignement »: Am Kader vun der Weiterbildung, déi ee Bachelorofschloss voraussetzt an dem Kandidat duerno d'Méiglechkeet gëtt, sech dem Concours ze stellen, deen den Accès an d'Funktioon vum Instituteur-stagiaire reegelt, mussen dës Kandidaten insgesamt véier theoretesch Epreuven an e Legislatiounsexamen maachen, déi bewäert an och gepackt musse ginn, fir datt se de Certificat de formation pédagogique erfollegräich ofschléissen. Et ass zousätzlech eng Inspektioun virgesinn, déi d'Agente fir d'Reussite vum Certificat packe mussen. D'Formatiounen fir dës Agente gräifen déi theoretesch Konzepter aus der allgemenger Didaktik an der Fachdidaktik verstärkt op an d'Agente mussen an hiren Epreuven déi Inhalter verdéiwen an se mat hirer Praxis verbannen, fir d'Epreuven ze bestoen.

Déi Agenten, déi no erfollegräichem Ofschloss vum Certificat de formation pédagogique de Concours schreiwen an sech hei en rang utile klasséieren, wiesselen an d'Karriär vum Fonctionnaire A2 eriwwe a réaliséieren hei ee Joer Stage.

Et sief bemierkt, datt esouwuel de Chargé de cours B1 ewéi och de Chargé de cours A2 eng Demande fir d'Reduktioun vun der Dauer vun der Période d'initiation maache kënnen, wa si virun hirem festen Engagement scho während enger gewëssen Zäit enseignéiert hunn. Des Weidere kann all Chargé de cours

eng Dispense vun engem Deel oder der Integralitéit vum Cycle de formation de début de carrière ufroen, am Fall wou entspriechend Formatioune schonn ofgeschloss goufen.

Aus den Erfarunge vun de leschte Promotiounen ass feststellen, datt net nëmmen d'Agenten am Parcours vun den Employés B1 Beruffserfarung an der Grondschoul hunn, mee datt och d'Agenten aus dem Parcours vun den Employés A2 mat méi Beruffserfarung am Enseignement deelhuele. D'Formatioune sollen erméiglechen, datt esouwuel d'Agenten aus der Karriär B1, wéi och d'Agenten aus der Karriär A2, u Formatioune deelhuele, déi se op de Schoukcontext virbereeden an déi hir Erfarunge matabezéien.

Wat de Contenu vun der Formatioun ugeet, esou gött et ee legale Kader, deen d'Instrumenter ewéi och d'Intervenante mat hirem jeeweilegen Aufgabeberäich festleet. Jee no Prerequis vun den eenzele Kandidate läit et natierlech no, datt um Niveau vum Suivi um Terrain eng differenziert Virgoensweis gewielt gött. Dës bedeit, datt e Kandidat, dee Lacunnen an engem Beräich huet, zousätzlech Mesuren ugebuede kritt, fir him ze hëllefen, dës Lacunnen ze iwwerwannen an him esou ee méiglechst gudden Start an de Beruff ze erméiglechen. Dës Virgoensweis gött och vun den Enseignanten am Kader vun der Prise en charge vun de Schüler verlaangt, vu datt och hei eng differenziert Virgoensweis ee wesentleche Facteur fir d'Réussite scolaire vun de Schülerinnen a Schüler ass.

Lëtzebuerg, den 11. Januar 2022

De Minister fir Educatioun,
Kanner a Jugend

(s.) Claude MEISCH